

Nunatta inuiattut timersornikkut unammersuarterfissaanik FIFA-p piumasaqaataanut naapertuuttumik pilersitsinerup avataaniit aningaasaliisussarsiuunnissaanut periarfissanik aningaasalersueriaasissatut ilusissamillu misissuisussanik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaaq aningaasalersuinissamik misissuinerup inerneranik UKA2020-imi Naalakkersuisut Inatsisartunut saqqummiutissagaat.

(Inatsisartunut ilaasortaaq, Anders Olsen, Siumut)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerneqarnera

Naalakkersuisut Inatsisartuni ilaasortaaq Anders Olsen, Siumut, Inatsisartut aalajangiiffigisassaattut siunnersuummik saqqummiussaqaamat qujapput.

Naalakkersuisut timersornermik siuarsaasoqarnissaa ineriartortitsisoqarnissaalu soqutigisariuarpaat, Naalakkersuisulli qularinngilaat maani nunatsinni timersullaqqissunik pisariaqartillugu nunarput sinnerlugu takutitsisinnaasunik peqartoq.

Siunnersuuteqartup siunnersuutigivaa Naalakkersuisut suleqatigiissitamik pilersitsissasut, suleqatigiissitallu Nunatta inuiattut timersornikkut Unammersuarfissaanik sananissamut aningaasaliisussat soqutiginnilersinniarlugit periarfissat misissussagai, unammersuarterfissarlu 300-500 mio. kr.-nit akornanni akeqartussatut missingiunneqarpoq. Naatsorsuutigineqarpoq suleqatigiissitaaq ukiumut sulisunik marlunnik imaluunniit 1 mio. kr.-inik naleqassasoq.

Nunatta inuiattut timersornikkut Unammersuarterfissaanik isiginnaartorpassuarnik pulaarfigineqarsinnaasup aammalu Kalaallit Nunaata nunanut allanut unammineranik isiginnaarfiusinnaasup pilersinnissaanut isumassarsiaq soqutiginaruusoq Naalakkersuisut isumaqarput. Pingaartumik isiginnaartarfissuaq timersuummik ataasiinnarmik timersorfiunani timersuutininik allanik aammalu timersuutaanngikkaluartunik takutitsiffiusinnaassappat. Meeqqat inuusuttullu sunngiffimmi peqqinnartunik sammisaqarsinnaasariaqarput timersorneruppat kulturikkulluunniit sammisaagaluarpat. Unammersuarterfik kulturikkut sammisanuttaaq atorsinnaassaaq.

Naalakkersuisut isumaqatigaat sungiusarfiit pitsanngorsakkat timersortartut ineriartornerannut angusaannullu pitsaasumik kinguneqassasut. Ineriartorneq innuttaasunut unammersuarterfimmik ulluinnarni atuisartunut iluaqutaassaaq, kiisalu illup iluani timersuutininik maannamut ingerlanneqanngitsunik neqeroorteqartoqarsinnaassalluni.

Kalaallit Nunaanni Timersortartut Kattuffiata aaqqissugaanik nuna tamakkerlugu timersorneq pillugu sapaatip akunnera 46-mi isumasioqatigiittoqalerpoq. Inatsisartuni ilaasortat isumasioqatigiinnermut tassunga qaaqusaanikuusut ilisimatinneqarpugut kaammattuutigaarpullu ilaanissarsi tassani periarfissaassammat timersortarfinnik atuisut qanimut eqqartueqatiginissaat.

Nunatta inuiattut timersornikkut Unammersuarterfissaanik pilersitsineq periarfissarpassuarnik ammaassisinnaavoq, tassani aamma Kalaallit Nunaata nunat tamalaat kattuffissuinut UEFA imaluunniit FIFA-mut. UEFA-mut ilaasortanngorneq isumaqarpoq, Kalaallit nunanut allanut arsamik unammisartui EM-imi arsarsinnaalernissaat kiisalu FIFA-ppat, siunissami nunanut allanut unammisartutta VM-imi illersortalersinnaanissai.

Avataaniit aningaasaliisussarsiornissamik periarfissanik aningaasalersueriaasissatut ilusissamillu misissuisussanik suleqatigiissitamik pilersitsinissaq oqaatigineqareersutut Naalakkersuisut isumaqatigaat.

Naalakkersuisut taamatut oqaaseqarlutik siunnersuut akuerineqassasoq inassutigaa.